

# 般若波羅蜜多心經

明 弘贊大師 科



甲初、釋題目 分二

乙初、正釋經題

般若波羅蜜多心經

乙二、釋譯人名

唐三藏法師玄奘奉詔譯

甲二、正釋經文 分二

乙初、顯說般若 分四

丙初、因人顯法 分三

丁初、能修之人

觀自在菩薩

丁二、所修之法

行深般若波羅蜜多時。

丁三、修證之位

照見五蘊皆空，度一切苦厄。

丙二、正示法空 分二

丁初、明蘊空

「舍利子！色不異空，空不異色，色即是空，空即是色；受、想、行、識，亦復如是。」

丁二、顯空德 分二

戊初、總標

「舍利子！是諸法空相，不生不滅，不垢不淨，不增不減。

戊二、別釋 分四

己初、釋蘊處界

是故，空中無色，無受、想、行、識；無眼、耳、鼻、舌、身、意；無色、聲、香、味、觸、法；無眼界，乃至無意識界；

己二、釋十二因緣

無無明、亦無無明盡，乃至無老死、亦無老死盡；

己三、釋四諦

無苦、集、滅、道；

己四、釋智得

無智，亦無得。

丙三、依法修證 分二

丁初、明菩薩得涅槃

「以無所得故，菩提薩埵依般若波羅蜜多故，心無罣礙；無罣礙故，無有恐怖，遠離顛倒夢想，究竟涅槃。

丁二、明諸佛得菩提

三世諸佛依般若波羅蜜多故，得阿耨多羅三藐三菩提。

丙四、結贊功德

「故知般若波羅蜜多，是大神咒，是大明咒，是無上咒，是無等等咒，能除一切苦，真實不虛，故說般若波羅蜜多咒。」

乙二、密說般若

即說咒曰：

「揭帝 揭帝 般羅揭帝 般羅僧揭帝 菩提 薩婆訶」